

**Aningaasarsianit akileraarutit pillugit Inatsisartut
inatsisaata allanngortinneqarnera-nik Inatsisartut
inatsisaat (Aappariit ataatsimut
akileraartussaataitanerannik atorunnaarsitsineq,
aammalu selskabit piginneqatigiissut iluminni
nuutsinerinut akeqartitsinermut, aamma selskabit
imminnut pigisut aningasanik attartortarnerinut CFC-
mik akileraarusiineq pillugit malittarisassanik
atuutilersitsineq)**

§ 1

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, Inatsisartut inatsisaanni nr. 2, 26. april 2007-imeersukkut allanngortinneqartumi, makkua allanngortinneqarput.

1. § 4 imatut oqaasertaqartinneqarpoq:

"§ 4. Aappariit isertitaminnit tamarmik immikkut akileraaruserneqassapput.

Imm. 2. Aappariinnut inooqatigiittunut tamarmik Kalaallit Nunaannut akileraartussaataitaasunut, aningaasarsianit akileraarutit pillugit inatsimmi malittarisassat malillugit isertitaannik akileraaruteqaataasussanik naatsorsuineqassaaq.

Imm. 3. Aappariit inooqatigiittut averuserneranni avinneranniluunniit inooqatigiinneq akileraartarnermut tunngatillugu averusernerup avinnerulluunniit pineraniit atorunnaartutut isigineqarpoq.

Imm. 4. Inooqatigiinnerup averusernertaqanngitsumik avinnerunngitsumilluunniit atorunnaarnerani, inooqatigiinneq akileraartarnermut tunngatillugu ukiup aningaasarsiorfusup inooqatigiikkunnarfusup naanerani atorunnaartutut isigineqarpoq.

Imm. 5. Aappariit averusernerup inooqatigiikkunnaarnerulluunniit kingunerisaanik inooqatigiikkunnaarsimanerup kingornatigut inooqatigeeqqilerpata, akileraartarnermut tunngatillugu piffissami inooqatigeeqqilerfusumi inooqatigiinneq ingerlanneqaqqilersutut isigineqassaaq.

Imm. 6. Aappariit arlaata akileraartussaannermut pisussaaffia atorunnaarpat, akileraartarnermut tunngatillugu inooqatigiinneq akileraarnissamut pisussaaffeqarnerup atorunnaarneraniittaamaatinneqartutut isigineqassaaq."

2. § 4-p kingornatigut ilanngunneqassaaq:

"§ 4 a. Isertitatinuussutissarsiummik suliffeqarfimmut attuumassuteqartut, aappaasumi inuussutissarsiummik suliffeqarfimmik ingerlatsisuusumi akileraaruserneqassapput. Aappariit marluullutik ingerlatsinermi peqataappata, isertitat aappaasumi annertunerpaamik inuussutissarsiummik suliffeqarfimmik ingerlatsisuusumi ilanngunneqassapput.

Imm. 2. Aappariit marluullutik aapparisaamit aappariinnilluunniit inuussutissarsiummik suliffiutigineqartumi ingerlatsinermik peqataasut akornanni akissarsianik isumaqatigiissut, akileraartarnermi sunniteqartinneqarsinnaavoq aatsaat, Inatsisartut inatsisaat manna aammalu sulisoqarnermut akitsuut pillugu Inatsisartut inatsisaanni pisussaaffiit eqqortinneqarpata. Akissarsianik isumaqatigiissut akileraartarnermut tunngatillugu sunniteqartinneqalersinnaavoq taamaallaat isumaqatigiissutaasup isumaqatigiissutigineqarneraniit. Aapparisaq annertunerpaamik inuussutissarsiummik suliffeqarfimmik ingerlatsisuunngitsup akissarsiai, aapparisaq inuussutissarsiummik suliffeqarfimmi sulineranut naleqqutinnngitsumik inissisimassanngillat. Aapparisaq imm. 1 malillugu inuussutissarsiummik suliffeqarfimmut tunngasunik isertitanik ilanngussisussa, aningaasarsianit akileraarutit pillugit inatsimmi malittarisassat malillugit sulisitsisutut pisussaaffinnik pisussaaffeqartutut isigineqassaaq. Tamatumani pineqartumut aappaasoq akissarsiortutut isigineqassaaq.

Imm. 3. Aappariit tamarmik aappaasumit aappariinnilluunniit inuussutissarsiummik suliffeqarfimmik ingerlanneqartumi ingerlatsinermi peqataappata, aappariillu suliffeqarfiup pisussaaffinut assigiimmik akisusaasuuppata, aappariit ataatsimoortumik qinnuteqarneq malillugu inuussutissarsiummik suliffeqarfiup angusarisai akunnerminni avissinnaavaat, avitsineq inuussutissarsiummik suliffeqarfiup ingerlanneqarnerani tunngavissaqartinneqarnera naapertorlugu. Peqataaneq akisussaaffillu allannguuteqaratik ukioq aningaasarsiorfik naallugu atuutsissapput. Akileraarusigaasussanik isertitat naatsorsorneqarneranni inuussutissarsiummik suliffeqarfiup pigisai akiitsuilu aappariit akornanni avinneqassapput, inuussutissarsiummik suliffeqarfiup angusarisaasa aappariinni avinneqarnerisa annertussusiligaaneranut naapertuuttumik.

Imm. 4. Aappariit imm. 3-mi malittarisassamik atuiniarnerminnik aalajangernertik allanngortissinnaavaat tamanna aappariinnit tamanit ukiup aningaasarsiorfusup naannginnerani akileraaruseriffimmut nalunaarutigineqarpat."

§ 4 b. Pisuussutitigut isertitat aapparisaq, aappariinneq pillugu inatsiseqartitsinermi pisuussutinik pineqartunik atuisinnaasup imaluunniit, aningaasartuutitut ilanngaaticineqarsinnaasunut tunngatillugu, akiligassamik akiliisussaasup, isertitaanik naatsorsuinermi ilanngunneqassapput. Aappariinni sorlermut akileraarutaasussanik isertitat tunngasuunersut aalajangerneqarsinnaanngippat, aappariit isertitat avissavaat.

§ 4 c. Pigisat nalillit akileraarutitigut nalikilliliissutigineqartut, aappaasumit katissimasamit inuussutissarsiummik suliffeqarfimmi ingerlatsinermi atorineqartut, aappaasumit pineqartumit nalikilliliinerit ingerlanneqassapput, pigisat pineqartumit imaluunniit pineqartup aapparisaanit inooqatigisaanit pigineqarnerat apeqqutaatinagu.

Imm. 2. Aapparisaq pigisat taassuma inuussutissarsiummik suliffeqarfiutaani atugassatut tunniuppagit nuuppagilluunniit, iluanaarutit annaasaqaatilluunniit tamatumuuna pinngortut, aapparisaq siulliullugu taaneqartup akileraarutaasussanik isertitaasa naatsorsorneranni ilanngunneqassanngillat. Tunniussinerup nuussinerulluunniit kingornatigut pigisat akileraartarnermi nalikilliliinernut tunngatillugu, aapparisaq kingulliullugu taaneqartumit pissarsiarineqarneranni piffissaq akigisimasaalu tungavigalugit

pissarsiarineqarsimasutut, siusinnerusukkullu nalikilliliinerusimasinnaasut, pineqartumit atuutsinneqarsimasutut ilanngullugit isigineqassapput.

Imm. 3. Malittarisassat matuma siuninnguutigut allaaserineqartut nioqqutissanik, aapparisaq tunniussisuusup inuussutissarsiummik suliffeqarfimmik ingerlataanut atasuusunik, tunniussinermit atuutinngillat.

Imm. 4. Imm. 2-mi malittarisassat aappaasumit pigisanik aapparisaq tunniussinermit imaluunniit pigisanik nuussinermit atuutinngillat, taassuma pigisanik nalilinnik atuutsitsinermit tamakkiisumik inuussutissarsiutitut ingerlanneraniit atorineqarneri inuttut namminerisamik atugassatut allanngortippagu imaluunniit inuttut namminerisamik atukkatut tamakkiisumik inuussutissarsiutitut allanngortillugu atulissagaluarpagit.

§ 4 d. Aappariit tamarmik immikkut akileraarutaasussanik isertitaat tunngavigalugit isertitaannit akileraarutissaat naatsorsorneqassapput.

Imm. 2. Aappariit arlaata akileraarutaasussanik isertitai amigartooruteqarfuppata aappariillu ukiup aningaasarsiorfusup naanerani inooqatigiippata, amigartoorutit sapinngisamik annertunerpaamik aapparisaq aappaata akileraarutaasussanik isertitaannit ilanngaatineqassapput. Ilanngaasiineq pissaaq, aapparisaq aappaata § 30, imm. 1 naapertorlugu ukiumi aningaasarsiorfimmis siusinnerusumi aningaasarsiat amigartoorutaasut atunngitsuukkat ilanngaatigereernerata kingorna. Tamatumunnga atatillugu aappariit akileraarutaasussanik isertitaannik naatsorsuinermit isertitat nunani allani nunamilu maaniunngitsoq akileraarusigaasut ilanngunneqassanngillat. Oqaaseqatigiinnili siulliit tulliini aalajangersagaq, isertitanit akileraarutit § 69 naapertorlugu isertitanit akileraarutinit appartinneqarsimappata, atuutsinneqassanngilaq."

§ 4 e. Katissimallugu aapparisaq ukiup aningaasarsiorfusup naanerani inooqateqartup inummut ilanngaata tamakkiisumik atorsinnaanngippagu, ilanngaatip atorineqanngitsortaa aapparisaasup akileraarutaasussanik isertitaannik appartitsinermit atorineqassaaq.

Imm. 2. Katissimalluni aappaartoqaapparisaq inooqateqartoq ukiup isertitaqarfusup naanerani § 20 naapertorlugu akileraarutaasussaangitsunik B-nik isertitaqarnissamut periarfissamik iluaquteqarsinnaasimanngippat, iluaqutigineqanngitsortai aappaasup B-nik isertitaannit ilanngaatissatut nuunneqassapput. Taamaattoorli akileraaruteqaataasussaangitsut nuutat aapparisaq B-nik isertitaannit amigartooruteqaataasinnaanngillat."

3. § 10 imm. 1 imatut oqaasertaqartinneqarpoq:

"Aappariinnermit toqukkut qimagaasup ataatsimut pigisat kingornussassanik agguassinertaqanngitsumik pigiinnarpagit, qimagaasup toqukkut qimaguttup akileraartarnermit tunngatillugu inissisimanerani taarsissavaa."

4. § 11 imm. 1 imatut oqaasertaqartinneqarpoq:

"Pigisanik qimatat toqukkut qimaguttoqarneranut atatillugu agguanneqarpata imaluunniit aappariinnermit qimagaasumit kingornussarsianik agguassinertaqanngitsumik pigiinnarneqarpata, toqukkut qimaguttup ukiumi aningaasarsiorfusumi toqukkut qimaguffigisaani akileraarutigisassai, isertitanit akileraarutaasutut, toqukkut qimagunneq sioqqullugu akilernerqartussaangortut, imaluunniit isertitanit tamanna sioqqullugu pissarsiarisimasanit ilanngaatineqartussat, akilernerqarneratigit inaarutaasumik aalajangiivineqarput."

5. § 11, imm. 2-mi "4.000 kr." allanngortinneqarput "10.000 kr."-inut aammalu "500 kr."-inut.

6. § 20, imm. 1, oqaaseqatigiit aappaat ima allassimassaaq:

"Ukiumi aningaasarsiorfusumi aappariit aappaata toqukkut qimagunneratigut aappariikkunnaarfusumi, aapparisaq qimagaasoq akileraarutaasussaangitsunik imm. 2-mi aningaasat aalajangerneqartut marloriaataannik ilanngaaserneqarnissamut akuerineqassaaq."

7. § 21, imm. 1, oqaaseqatigiit aappaat ima allassimassaaq:

"Ukiumi aningaasarsiorfusumi aappariit aappaata toqukkut qimagunneratigut aappariikkunnaarfusumi, aapparisaq qimagaasoq aalajangersimasumik ilanngaammik imm. 2-mi aningaasat aalajangerneqartut marloriaataannik ilanngaateqartinneqassaaq."

8. § 34, imm. 1, nr. 3-mi „aappariit ataatsimut akileraarusigaasut” allangortinneqassaaq „aappariit inooqatigiittut”-nut

9. § 36, imm. 1 atorunnaarsinneqassaaq aammalu imm. 3 imm. 2-nngortinneqartumi "imm. 2" allangortinneqassaaq ima "imm. 1".

Tamatuma kingorna imm. 2-miit 5-imut imm. 1-miit 4-nngorput.

10. § 36-p kingornagut ilanngunneqassaaq:

"§ 36 a. Aningaasarsianit akileraaruteqaataasussanit naatsorsuinermit, akileraartus-saatitaasut

1) inunnit inatsisitigulluunniit akisussaassuseqartumit aalajangiisuusumik sunniuteqarfigineqartuusut, matumani ilanngullugit selskabit aamma peqatigiiffiit il.il. Kalaallit Nunaanni akileraartarnermut inatsit naapertorlugu akileraartussaataasutut taasaanngippata kisiannili pissutsit selskabit ingerlatsineranni maleruagassanut aalajangersarneqarpata, selskabit isumaqatigiissutaasigut imaluunniit peqatigiiffiit maleruagqusaannut sunniuteqartinneqarpata, imaluunniit

2) imaluunniit inatsisitigut akisussaassuseqartuusunut aalajangiisuusumik sunniuteqartuusut imaluunniit

3) inummik inatsisitigut akisussaassuseqartumik suliffeqarfissuarmut attaveqartut,

4) nunani allani aalajangersimasumik ingerlatsiviutilik, imaluunniit

5) inuk inatsisitigulluunniit akisussaasuusoq nunami allamioq Kalaallit Nunaanni aalajangersimasumik ingerlatsiveqartoq il.il, takuuk § 2, imm. 1, nr. 10-miit 12-imut,

matuma inummik inatsisitigulluunniit akisussaassuseqartumik aalajangersimasumillu ingerlatsivinnik niuernikkut aningaasatigullu iliuuseqarfigisaqarnermi (nakkutigisaasumik iliuutsit) il.il. akit tungavissarisallu, niueqatigiinnerit attaviitsuusut illuatungeriit akornanni naammassineqarsimagaluarpata angusarisimasinnaasassat, atussavai.

Imm. 2. Aalajangiisuusumik sunniuteqarneq matumani paasineqassaaq piginnittuuneq

taasisinnaanermulluunniit pisinnaatitaanermik atuisinnaaneq, tamatumuuna toqqaannartumik toqqaannartuunngitsumilluunniit aktiatigut aningaasaatigisat 50 procentii sinnerlugit pigineqarlutik imaluunniit taasisinnaanerit 50 procentii sinnerlugit taasisinnaassuseqarneq. Akileraartussaataasup inummut inatsisitigut akisussaassuseqartuusumut nakkutilliisutut isigineqassanerani, imaluunniit akileraartussaataasooq inummit inatsisitigut akisussaassuseqartuusumit imaluunniit inummit aalajangiisuusumik nakkutigineqarnersoq naliliiffiginninnermi makku ilanngunneqassapput:

1) aktiat taasisinnaanermulluunniit pisinnaatitaanerit, suliffeqarfissuarmut atasuusunik selskabinit, imm. 3 naapertorlugu taasat, aamma

2) inunnit aktiaateqartuusunit qanigisaannillu,

3) aningaasaateqarfimmit imaluunniit selskabinit kattusseqatigiiffimmit piginnittuusumit namminermit pilersinneqartumit imaluunniit selskabinit suliffeqarfissuarmut atasuusunit taaneqartunit, qanigisanit il.il. imaluunniit aningaasaateqarfimmit taakkuninnga pilersinneqartunit pigineqartut ilanngullugit

naatsorsuutigineqassapput,

4) taamatuttaaq piginneqataassutsit taasisinnaanermullu pisinnaatitaanerit, selskabimi peqataasunit allanit, selskabimi peqataasup atuinnissamik nakkutilliinnissamillu isumaqatigiissuteqarfigisimasaanit, pigineqartut naatsorsuutigineqassapput, aamma

5) inummut § 1-imi pineqartumut ilaasumut qanigisat imaluunniit aningaasaateqarfik kattusseqatigiiffiit tamakkuninnga pilersinneqartut peqatigalugit piginneqataassutsit taasisinnaanermullu pisinnaatitaanerit naatsorsuutigineqassallutik.

Imm. 3. Qanigisatut isigineqarput akileraartussaataitaasup katissimallugu aapparisa, angajoqqaavi aanakkui aatakkui taamatullu meeqqat ernguttallu tamakkualu katissimallugit aapparisaat imaluunniit inuit taagorneqartut toqukkut qimagunneranni pigisanik qimatat. Meerarsiat meeravissiartaallu toqqartumik qanigisarianut ilaatinneqarput.

Imm. 4. Selskabit suliffeqarfissuarmut atasuusut tassapput:

1) selskabit peqatigiiffillu il.il. aktiaateqartuusut taakkuusut, pisassarisap pissarsiarineqarnerani kingusinnerusukkulluunniit toqqaannartumik toqqaannanngitsumilluunniit selskabini ataasiakkaani taasisinnaanernik 50 procentii sinnerlugit piginnittuuffigisaat.

2) selskabit peqatigiiffillu il.il., aktiaateqartuusut taakkuusut pisassarisap pissarsiarineqarnerani kingusinnerusukkulluunniit toqqaannartumik toqqaannanngitsumilluunniit selskabini ataasiakkaani taasisinnaanernik 50 procentii sinnerlugit atuisinnaaffigisaat.

3) aningaasaateqarfik selskabillu, aningaasaateqarfiup pisassarisap pissarsiarineqarnerani kingusinnerusukkulluunniit toqqaannartumik toqqaannanngitsumilluunniit selskabini ataasiakkaani tamani aktiatigut aningaasaatit 50 procentii sinnerlugit pigisaqarfigisai, imaluunniit

4) aningaasaateqarfik selskabillu, aningaasaateqarfiup pisassarisap pissarsiarineqarnerani kingusinnerusukkulluunniit toqqaannartumik toqqaannanngitsumilluunniit selskabini ataasiakkaani tamani taasisinnaanernik 50 procentii sinnerlugit atuisinnaaffigisai.

Imm. 5. Aktiaateqartuusut imm. 2, oqaaseqatigiit sisamaanni taaneqartut aktiaateqartuusut naliliiffigineqarneranni aktiaatilittut ataasiusutut isigineqarput. Taasisinnaassutsinik piginneqataassutsit naatsorsorneqarneranni taasisinnaanernik, taasisinnaanermik aktianik qularnaveeqqusiilluni nuussinnermut atatillugu pissarsiarineqartut kisimik, naatsorsuutigineqassanngillat.

Imm. 6. Inatsisitigut akisussaassuseqartuusooq inulluunniit nunami allamiutut isigineqassaaq, inuk naalagaaffimmi allami, Danmarkimi Savalimmiuniluunniit, nunaqartuuguni, tamatumani aamma marloriaammik akileraannginnissaq pillugu isumaqatigiisummi aalajangersakkat malillugit

Imm. 7. Akileraarusigaasussanik isertitat annertussusiliiffigineqarnerisa imm. 1 malillugu allanngortinneqarnerini, akileraartussaataitaasup annertunerusumik malitseqartitsinikkut allannguinerit (malitsigisatut iluarsinerit) pinngitsoortissinnaavai, imm. 1-imi akit piumasaqaatillu naapertorlugit akiliinissamut pisussaalertermigut. Imm. 1 taamaallaat atorineqassaaq nakkutigisaasumik iliuutsimi § 36 b-mi pineqartumik pisoqartillugu, akileraartartermut oqartussaasoq nunami allamioq pineqartoq akileraarusiissappat, akileraarutaasussanik isertitat imm. 1 naapertorlugu annertussusilerneqarneranni akit piumasaqaatillu tunngavigineqartut naapertorlugit.

§ 36 b. Akileraartussaataitaasut § 36 a-mi pineqartut nammineerluni nalunaarummi, § 36 a-mi taaneqartunik inunnik inatsisitigullu akisussaasuusunik aalajangersimasumillu ingerlatsiviusunik illuatungeqarluni niuernikkut imaluunniit aningaasatigut ingerlatitsinerit (nakkutigisaasunik iliuutsit) suuneri annertussusiilu pillugit, paasisstissanik tunniussissapput.

Imm. 2. Akileraartussaataitaasut nakkutigisaasunik iliuutsinut akit piumasaqaatillu qanoq aalajangerneqarsimanerannut allakkatigut uppersaatinik sanassapput toqqortaralugillu. Allakkatigut uppersaatait ukioq naatsorsuuseriffiusup suliami pineqartumi attuumassuteqartup naaneraniit ukiuni tallimani isumannaatsumik toqqortarineqassapput. Allakkatigut uppersaatait akileraartarnermi oqartussaasut qinnuteqarneratigut tassunga takutinneqassapput, imaattuusariaqarlutillu akit piumasaqaatillu, iliuutsit illuatungeriit attaviitsuusut akornanni naammassineqarsimagaluarunik atuuttuusimasussanut naapertuunnersut naliliinissamut tunngavissaasinnaassallutik.

Imm. 3. Akileraartussaataitaasoq imm. 2 malillugu uppersaammik sanasimanngippat, akileraaruserinermik ingerlatsineq pillugu inatsimmi § 19, atuutsinneqassaaq.

§ 36 c. Ernianut aningaasartuutit nalitigullu annaasaqaatit, nakkutigisaasumik akiitsut sinneruttortaanut tunngasut taakkua nakkutigisaasunik iliuuseqarnikkut akiitsut pillugit sinneqartoorutineersuutillugit taakkualu selskabinit peqatigiiffilluunniit il.il. pigippatigut, taava piginnittuusut ilanngaasiisinnanngillat

1) selskabi imaluunniit peqatigiiffik § 1, imm.1-imi, nr. 3-mit 14-imut pineqartunut ilaappat

2) selskabi imaluunniit peqatigiiffik inatsisitigut akisussaassuseqartuusumut nunami allamiumut § 36 a, imm. 1-imi (nakkutigisaasumik akiitsut) taaneqartumut akiitsoqarpat aamma

3) selskabip peqatigiiffilluunniit allanit aningaasaliiffineqarnerata (akiitsui) ukiup aningaasarsiorfusup naanerani selskabip namminerisanik aningaasaataanut sanilliullugit 2:1-mut annertunerusumik annertussuseqarpata.

Imm. 2. Imm. 1 naapertorlugu nalitigut annaasaqaatit taarsigassarsiani pineqartuni nalitigut annaasaqaatit ukiumi aningaasarsiorfusumi tulliusumi iluanaarutinit ilanngaatineqarsinnaapput.

Imm. 3. Allanit atukkat, aalajangiisuusuullutik piginnittut imaluunniit tamatumuuna suliffeqarfissuarmut atasunit selskabinit toqqaannartumik toqqaannartuunngitsumilluunniit qularnaveeqqusigaasimasut, nakkutigisaasumik akiitsutut isigineqarput.

Imm. 4. Ilangaasiisinnanermut killiliineq, selskabip peqatigiiffilluunniit, selskabimut piginnittuusumut, tamatumuunalu aamma suliffeqarfissuarmut atasuusunik selskabinut, aningaasaliinerup assingusup atuuttuuneranik uppersaasiinera naapertorlugu atuutissanngilaq.

Imm. 5. Ilangaasiisinnanermut killiliineq nakkutigisaasumik akiitsut 5 mio. koruunit sinneqqappatsigit aatsaat pisinnaavoq. Ilangaasiisinnanermut killiliineq aamma nakkutigisaasumik akiitsut namminerisamik aningaasaatinut, ukiup aningaasarsiorfusup naanerani allanit aningaasaliissutit (akiitsut) namminerisamillu aningaasaatinut sanilliullugit 2:1-imut nikingassuseqartinniarlugit, nuunneqartortaanut taamaallaat atorpeqassaaq. Suliffeqarfissuup iluani nakkutigisaasunik akiitsoqarlunilu nakkutigisaasunik allanut akiitsoqarpat, ilanngaateqarnermik killiliineq suliffeqarfissuup iluani nakkutigisaasunik akiitsunut siullermik atorpeqassaaq tulliullugulu nakkutigisaasunik allanut akiitsunut.

Imm. 6. Akiitsutut isigineqarput pisassarisanut § 17, imm. 1-imi aamma § 18, imm. 1-imi pineqartunut tunngatillugu aammalu obligationinut nuunneqarsinnaasunut akiitsut. Akiitsut ukiup aningaasarsiorfusup naanerani nalitigut naligititaasutut naatsorsorneqassapput.

Imm. 7. Namminerisanik aningaasaatit ukiup aningaasarsiorfusup naanerani pigisat niuernermi naliusumut naatsorsukkatut, imm. 6 malillugu akiitsunik ilanngaaserlugit naatsorsorneqassapput. Namminerisanik aningaasaatigisat piginnittuusunit aningaasaliissutaasut, sivikinnerpaamik ukiuni marlunni selskabimiittussaasut kisimik ilanngunneqassapput.

Imm. 8. Kalaallit suliffeqarfissuarmut atasunik selskabiutaat arlaqartut aqunneqarpata, takuuk § 36 a, imm.

4, selskabini taakkunani pigisanut akiligassanullu imm. 1-7 ataatsimoortillugit atorineqassapput, kalaallillu selskabiisa selskabini allani, naatsorsuineri tamarmiusumi ilaatinneqartuni, aktiaataat ilanngunneqassanngillat, aammalu taakkua akornanni akiitsut pisassarisaallu.

Imm. 9. Imm.1-miit 8-mut taamatuttaaq atuupput akileraartussaataasunut § 2, imm. 1, nr. 10-mi ilaatinneqartunut. Akiitsut namminerisaniillu aningaasaatit 1mm. 2 aamma 3 malillugit naatsorsorneqarneranni, pigisat akiitsullu nalingi aalajangersimasumik ingerlatsivimmut attuumassuteqartut taamaallaat ilaassapput. Allani atukkat nakkutigisaasumik akiitsutut isigineqarput, qitiusumik allaffik akiitsunut akiliisussaasuuppat.

§ 36 d. § 1 imaluunniit § 2, imm. 1, nr. 10-miit 12-imut malillugit akileraartussaataasooq § 36a, imm. 2 naapertorlugu annikitsumik akileraarusigaasumik inatsisitigut akisussaassuseqartumik (ingerlatseqatigiiffik pigineqartoq), takuuk § 36 a, imm. 6, aningaasaliinertigut pigisat agguaqatigiissitsineri selskabip pigisaanit tamarmiusunit 10 procenti sinnerlugu amerlassuseqarfigisaanni, akileraartussaataasup aningaasarsiai akileraaruteqaataasussat naatsorsorneqarneranni ingerlatseqatigiiffup pigineqartup CFC-mik isertitai ilanngutissavai.

Imm. 2. Nunami allami selskabi pigineqartoq annikitsumik akileraarusigaasutut isigineqassaaq, nunami allami akileraarusiineq Kalaallit Nunaanni malittarisassa at malillugit annertuumik appasinneruppat akileraarusiinnerluunniit Kalaallit Nunaanni malittarisassaanut sanilliussineri annertuumik illuartinneqarpat.

Imm. 3. Ingerlatseqatigiiffup pigineqartup pigisaanik imm. 1 malillugu naatsorsorneqarnerat naatsorsuutini naligititaasut tunngavigalugit ingerlanneqassaaq, tigussaasuunngitsunut niuernerimi akigitinneqartut malillugit nalingi tunngavigalugit ilanngunneqassallutik.

Imm. 4. CFC-mik isertitat selskabip pigisat isertitaanut, akileraartussaataasup selskabip pigineqartup ukiumi aningaasarsiorfusup pineqartup ingerlanerani aktiatigut aningaasaataanit tamarmiusunit akileraartussaataasumit pigineqataasutaanit annertunerpaajusut amerlaqataat, ilaasutut naatsorsorneqassapput. Selskabilli pigineqartup ukiup aningaasarsiorfusup ilaani, imm. 1-imi piumasaqaatit naammassine-qarfigisaasa nalaani isertitanik katersorsimasai, kisimik ilanngunneqassapput.

Imm. 5. CFC-mik isertitat, Inatsisartut inatsisaat manna tunngavigalugu naatsorsorneqassapput makkua katinnerattut:

- 1) Akileraarutaasussanik ernianik isertitat ilanngaaticigineqarsinnaasunillu ernianut aningaasartuutit.
- 2) Pisassarisanit, akiligassanik imaluunniit aningaasaliinermut tunngasunik isumaqatigiissutitigut akileraarutaasussanik iluanaarutit ilanngaaticigineqarsinnaasunillu annaasaqaatit.
- 3) Sullissineriut ernialiuttakkat (provision) assigisaallu, ilanngaaticigineqarsinnaasat.
- 4) Aktianik tunisinerni akileraarutaasussanik iluanaarutit ilanngaaticigineqarsinnaasunillu annaasaqaatit.
- 5) Aktianik tunisinerni akileraarutaasussanik iluanaarutit ilanngaaticigineqarsinnaasunillu annaasaqaatit.
- 6) Akiliutit qanorluunniit ittut, tigussaasuunngitsunik pigisanik atuinermut atuisinnaanermulluunniit akiliutitut pissarsiarineqartut. Oqaaseqatigiilli siulliit atuutinngillat, selskabinit, selskabimik pigineqartumut suliffeqarfissuarmut atasuunngitsumit, § 36 a, imm. 1 naapertorlugu, selskabip pigineqartup nammeneq ilisimatuutut misissuineri ineriartortitsinerimillu ingerlataqarneranik patsiseqartumik tigussaasuunngitsunik pigisanik atuinermut atuisinnaanermulluunniit akiliutinut tunngatillugu. Tigussaasuunngitsunik pigisanut ilaapput suulluunniit atuakkamut, eqqumiitsuliornikkut ilisimatuussutsikkulluunniit sulianut, tamatumani aamma filminut aammalu radiomut fjernsynikkulluunniit

aallakaatitassiatut filminut, piginnittussaanerit, patentit tamarmik, nioqqutissanut meqqi, allaq iluserluunniit, titartagaq, formeli isertuussaq imaluunniit sanariaaseq isertuussaq suliffissuaqarnermulluunniit tunngasumik paasissutissaq, aningaasarsiornikkut ilisimatuussutsikkulluunniit misilittakkat.

7) Akileraartarnermi ilaanngaait, nr. 1-imiit 6-imut taagorneqartunik isertitanut tunngasut Akileraarusigaasussanik attartornermut aningaasaliinikkut isertitat.

8) Pigisanik, aningaasaliinikkut attortornermut atugaasimasunik tunisaqarnermi iluanaarutit annaasaqaatillu, aamma ilanngunneqassapput.

9) Akileraarutaasussanik sillimmasiinerimik ingerlatsinerimut atatillugu, aningaaserivittut realkreditinstitutionit imaluunniit allatigut aningaasaliinernik ingerlatsinikkut isertitat.

Imm. 6. CFC-mik isertitat naatsorsorneranni CFC-mik isertitat amigartoorutitaat § 30-mi malittarisassat naapertorlugit selskabip pigineqartup isertitaanit ilanngaatineqarsinnaapput.

Imm. 7. Nunani allani akileraarutimik akilikkanik appaateqartitsineq § 69 malillugu pissaaq."

11. § 41, imm. 1. oqaaseqatigiit siulliit tullii allanngortinneqarput "aappariit ataatsimut akileraarusigaasut imaluunniit nalunaarsugaasumik inooqatigiit" imaalillugu: "inooqatigiillutik aappariit imaluunniit nalunaarsugaasumik inooqatigiillutik najugaqatigiit".

12. § 67, imm. 2. oqaaseqatigiit siulliit atorunnaarsinneqarput

13. § 68, imm. 4, atorunnaarsinneqarpoq.

14. § 96 atorunnaarsinneqarpoq.

§ 2

Imm. 1. Inatsisartut inatsisaat 1. januar 2008 atuutilerpoq ukiorlu aningaasarsiorfusoq 2008 aallarnerfigalugu sunniuteqalerluni, taamaattorli takuuk imm. 2.

Imm. 2. § 1, nr. 9 aamma 10, 1. maj 2007-imiit atuutilerput. Aningaasarsianit akileraarutit pillugit Inatsisartut inatsisaanni § 36, imm. 1-imi aalajangersagaq, inatsimmilu matumani § 1, nr. 9-kkut atorunnaarsinneqartoq 1. maj 2007 sioqqullugu nuussinernut atuutiinnassaaq.

Namminersornerullutik Oqartussat, ulloq 15. november 2007

Hans Enoksen

/

Aleqa Hammond

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut